


Суннат ва замонавий илм

Исломга кирган ҳарбий учувчи

Muallif
Нозимжон Ҳошимжон

05.02.2022
Ko'rishlar: 3,919

Manba: islom.uz



Аллоҳ таоло Қуръони Каримда шундай деб марҳамат қилган:

﴿ شَرَعَ لَكُمْ مِنَ الدِّينِ مَا وَصَّىٰ بِهِ نُوحًا وَالَّذِي أَوْحَيْنَا إِلَيْكَ وَمَا وَصَّيْنَا بِهِ إِبْرَاهِيمَ وَمُوسَىٰ وَعِيسَىٰ أَنْ أَقِيمُوا الدِّينَ وَلَا تَتَفَرَّقُوا فِيهِ ﴾ كَبُرَ عَلَى الْمُشْرِكِينَ مَا تَدْعُوهُمْ إِلَيْهِ ﴿ اللَّهُ يَجْتَبِي إِلَيْهِ مَنْ يَشَاءُ وَيَهْدِي إِلَيْهِ مَنْ يُنِيبُ

«У Зот сизларга дин этиб, Ўзи Нуҳга васият қилган ва сенга ваҳий қилган ҳамда Иброҳим, Мусо ва Ийсога васият этган нарсамизни шариат қилди: «Динни барпо қилингиз ва унда тафриқага тушмангиз!» Мушрикларга сен даъват қилган нарса оғир келди. Аллоҳ Ўзи хоҳлаган кишини танлаб олур ва Ўзигагина тавба қилувчи кишини ҳидоят қилур» (Шууро сураси, 13-оят).

Рики Митчелл 1956 йилда АҚШнинг Калифорния штати Беркли шаҳрида насроний

оилада туғилди. У 1977 йилда АҚШ ҳарбий-ҳаво кучларида хизмат қилаётганда мақсадсиз олиб борадиган турмуш тарзининг аҳамиятига шубҳа қила бошлади. Ҳар сафар парвоз қилганида ҳаёти осмон билан ер ўртасида муаллақ ҳолда қолаётганини ҳис қилиб, ўлим ҳақида ўйларди, агар у ўлса ва унинг ҳаёти ниҳоясига етса, нима юз бериши ҳақида тафаккур қиларди.

У ўзининг ҳаёти ва дунёга келишидан мақсад нималиги ҳақида узоқ вақт фикрлаб, тафаккур қилгандан сўнг атрофдагилар билан бу борада баҳслаша бошлади. динлар ва фалсафалар ҳақида кўп ўқиди ва ниҳоят Исломдан бошқа хавфсиз бошпана йўқлигини тушуниб етди ва ҳаёлига келган барча саволларига Исломдан жавоб топди.

У Вашингтон университетиде халқаро муносабатлар бўйича фахрий бакалавр даражасини, сўнгра Рутгерс университетиде сиёсатшунослик магистри даражасини қўлга киритди.

Ҳарбий ҳаво кучларидаги хизмати уни ўйлашга ундади. Чунки учувчи парвоз пайтида ўлимга сабаб бўлувчи вазиятга кўп дуч келади.

Ва ниҳоят Аллоҳ таоло Рикининг қалбини Тўғри Йўлга очиб қўйди ва Рики Исломга кирди ва Зайд Шокир номини олди.

Зайд Жанубий Африкадаги ирқчилик воқеаларини тугатишни муваффақиятли амалга оширган ҳаракат етакчиси бўлди.

Калифорнияда маҳаллий Исломий марказ – Ҳуда масжидини таъсис этишда иштирок этди.

Қоҳирада бир йил араб тилини ўргангач, АҚШнинг Коннектикут штатининг Нью-Хейвен шаҳрида истиқомат қилиб, ўша ердаги масжидда бир неча йиллар имомлик қилди.

У 2001 йилда Дамашқдаги Абуннур академиясининг биринчи битирувчиси бўлиб, ҳамкасбларининг гувоҳлик беришича, у Шомнинг бир қатор таниқли олимларидан сабоқ олган. Зайд Марокашга ҳам қисқа муддатга саёҳат қилган.

2003 йилда Калифорниядаги Ал-Зайтуна институтида резидент тадқиқотчи бўлиб ишлаган, 2008 йилда эса ислом илмларини қайта тиклаш ва уни ўқитиш услубларини сақлаб қолиш мақсадида шу штатдаги Хейворд шаҳридаги Ал-Зайтунанинг факултетига асос солган.

Шайх Зайд исломий даъват соҳасида мутахассис ҳисобланади. У Ислом тафаккури ва Ислом тарихи бўйича мунтазам курслари бор.

У Ислом дини ва замонавий масалалар бўйича маърузалар ўқиш учун жуда кўп давлатларга сафар қилди.

Шайх Зайд жоҳиллар томонидан ўртага ташланадиган шубҳаларга раддия бериш йўлини танлади.

У 2002йилдан 2007 йилгача таниқли телебошловчи Билл Мойерс билан телекўрсатувларда махсус меҳмон сифатида қатнашди.

Зайд Шокир “Биз Аллоҳ ҳақида гапира оламизми?” деб номланган машҳур баҳсда британиялик файласуф Рожер Скрутон билан иштирок этди. Аллоҳ таоло бу баҳсда Зайдга муваффақият ато этди. Зайд сабабли жуда кўпчилик Исломга кирдилар. Баҳсни томоша қилишга келганларнинг гувоҳлик беришича, Зайд исломофоблар томонидан ўртага ташланадиган мавзулар бўлмиш “Исломнинг аёлларни уришга рухсат бергани” ва “Кўпхотинликка рухсат бергани” мавзуларида фикр юритиб, шу мавзуларни кўтариб, Исломга таъна тошини отувчиларга ақл ва мантиқ ила раддиялар берган ва уларнинг таъналарини ер билан яксон этган.

Зайд Шокир Ғарбда нуфузли мусулмон шахслардан саналади. Масалан, Жон Эспосито ва Иброҳим Калин томонидан таҳрир қилинган ва 2009 йил 20 ноябрда Қироллик стратегик тадқиқотлар маркази (Иордания) томонидан чоп этилган “Энг нуфузли 500 мусулмон” ҳисоботида Зайд Шокир “нуфузли Ислом олими” сифатида таърифланган.

Зайднинг бир қанча асарлари бор. Жумладан, “Тафсир”, “Қуръоний илмлар”, “Америкада маданият ва Ислом” кабилар.

The New York Times газетасининг ёзишича, Зайд Шокир экстремизмни қораловчи энг кучли ва нуфузли тўққизта мусулмон олимларидан бири ва бугунги кунда Америкада Исломнинг асл моҳиятини тушунтиришда фаол ўқитувчилардан бири.

Зайд Шокир бугунги кунда Калифорниянинг Хейворд шаҳридаги Ал-Зайтунанинг факултетидеда устоз бўлиб хизмат қилмоқда.

Аллоҳ таоло Зайд Шокирнинг Ислом ривожини йўлидаги хизматларига берадиган ажрини кўпайтириб берсин!

Фойдаланилган манбалар

islom.uz

Quran.ksu.edu.sa

Quran-m.com

islamstory.com

alanba.com.kw

matn.uz

Нозимжон Ҳошимжон тайёрлади